

廬山蓮宗寶鑑念佛正願卷第七章 素六

念佛正願說

理由智導行由願興行願得均理智兼備理  
智兼備則心心念念總是彌陀刹刹塵塵皆  
為淨土自非大願行力曷能臻此哉欲人人

素六

證此三昧者要在信願深其根本也夫願者  
樂也欲也欲生西方淨土樂見阿彌陀佛故  
發此願是以憑大願力直要到彼也所以慈  
照云時時發願樂慕往生日日禱祈勿令退  
失如無願心則善根沉沒華嚴經云不發大

願是為魔事所以普賢廣無邊願海彌陀有  
六八願門是知十方諸佛上古先賢皆因願  
力而得成就菩提不與願樂之心不成願樂  
之行故云法門廣大無願不成是以佛隨人  
之心滿人之願何況專修念佛願生淨土安  
得不遂心滿願哉懺云願我不退菩提心願  
我決定生安養願我速見彌陀佛願我盡生  
無別念唯心淨土獨相隨又阿彌陀經云若  
有信者應當發願願生彼國又懺云衆生無  
邊誓願度煩惱無盡誓願斷法門無量誓願

學佛道無上誓願成此則謂之四弘誓願故我慈照集懺恐人着事迷理乃云自性衆生誓願度自性煩惱誓願斷自性法門誓願學自性佛道誓願成此四句直明真理欲令一切人於自性中度了一切妄念衆生所謂邪

迷雜想貪癡嫉妬嗔怒惡毒等心故令發大誓願自性自度也又於自性中斷除一切煩惱所謂塵勞業識邪思惡念猶如浮雲障覆自性光明不現故令發大誓願自斷除之永不令起又於自性中修學一切法門所謂念

佛三昧悲智行願無量法門故令發大誓願自悟自修常無退失直至菩提不以得少爲足又於自性中自信有佛發大誓願常自觀照自願成佛菩提此乃慈照老婆心切明明與後人開了一箇門戶只要你諸人自信自

素六

二

肯從這裏入頭悟自性彌陀蓮唯心淨土入諸佛境界成就無上菩提嗟乎世之善人不知此意向外別求何異持神珠而巡乞也可不感乎普願見聞遙相勸策同與正念早上玄途覺前前非明後後位立大志氣奮大勇

狂發大誓願誓度無邊衆生誓斷無盡煩惱  
誓學無量法門誓願往生西方極樂世界見  
阿彌陀佛誓同一切善人圓成無上佛道可  
謂不得春風花不開花榮須感春風力

### 勸發大願

慈照云有行無願其行必孤有願無行其願  
必虛無行無願空住閻浮有行有願直入無  
爲此乃佛祖修淨業之根本也備觀今時信  
人皈投佛會或爲病苦而發心或爲報親而  
舉意或爲保扶家宅或爲怖罪持齋雖有信

心而無行願雖云念佛不達本根凡修善緣  
皆爲了還心願罕有爲自己生死發願念佛  
求生淨土者往往香燭道場祝願回向之辭  
皆是表獻神明消災延壽而已故與經懺本  
意相違不合諸佛本願縱使一生修誦不明

卷六

二

理趣錯用工夫是謂終日數他寶自無半錢  
分也臨終所以不得往生淨土者蓋無行願  
故也又有一等癡人投佛受戒乃於三寶前  
焚香誓願云我若破戒甘當惡病纏身永墮  
地獄或言左眼出血右眼出膿自肯自甘類

官司之執結多見有口無心破齋犯戒自願受報痛苦奚堪甘心墮落之門自取喪身之兆殊不知佛祖興慈運悲何嘗教人如此皆是邪師過謬錯將罰咒以爲發願耳何惑之甚哉予嘗憫念勸令同發正願求生淨土願

同作佛彼則曰我是凡夫豈敢望生淨土要作佛耶我有此心又成妄想予應之曰不然善知識佛是覺也淨土是心也此心誰不有之覺即佛也迷則衆生也世人背覺合塵輪迴三界四生六道善惡業緣受報好醜皆因

妄認四大爲我身六塵爲實有隨入幻境日夜流轉未嘗暫省回光從生至老惟憂家緣不辦財不稱心愈多愈求愈貪不足雖曰積善奉佛禮拜作福燒香只願富貴榮華長生不死纔做此小好事便有伏願數般要保穀

米盈倉蚕絲倍萬子孫光顯牛馬孳生纔有一不如意便怨佛不保全日日財喜增添始道天龍感應如此貪謀正是妄想自不知覺却言念佛求生淨土之說作妄想者豈不大顛倒乎凡曰作福盡屬有爲蓋世間有漏之

因非出世無爲之道修行佛子宜善思惟今日有緣得逢佛法當須究本莫競枝條一念回光修出世法願捨娑婆願生淨土亦如又客在於它鄉思欲歸于故里也此願生淨土願作佛之心豈可比同凡夫妄想哉豈不見

素真

四

懺中云願我臨欲命終時盡除一切諸障礙面見彼佛阿彌陀即得往生安樂刹者是也可謂一朝踏着來時路始覺從前錯用心

慈照宗主示念佛人發願偈并序

彌陀節要云念佛之人最急一事不善相應

何以故雖云持戒念佛不會發心願生淨土皆是埋頭過日自失善利大凡念佛先要發心欲超生死往生淨土須以大願自爲主意常須念佛早晚專心禮拜彌陀如朝帝主兩不失時日近日親心口與佛相應去佛不遠

口念心想心願見佛發深重願決信無疑日久歲深工夫純熟自然三昧成就臨命終時彌陀接引淨土現前更願現生之內常遇善知識不值邪見師無惑我心不生懈怠若也如此念佛深信發願是信行願三不虧也臨

終見佛即非外來盡是唯心顯現猶如種子  
在地逢春發生豈是外來皆從地出也今之  
修行亦尔念佛信願納在八識心地臨終發  
現淨土彌陀即非外來皆從自心出也偈云

萬法從心生

萬法從心滅

素六

五

我佛大沙門

常作如是說

持戒無信願

不得生淨土

唯得人天福

福盡受輪迴

展轉難脫離

看經無慧眼

不識佛深意

後世得聰明

亂心難出離

不如念佛好

現世無名利

行坐不多羅

則是阿彌陀

發願持戒力

回向生樂國

正是合行持

千中不失一

釋迦金口說

彌陀親攝受

諸佛皆護念

諸天善護持

見此念佛人

與佛不相遠

應當坐道場

轉于大法輪

普度無邊眾

譬如貧家女

腹孕轉輪王

諸天常愛護	貧女自不知
腹中有貴子	今此念佛人
其意亦如是	憶佛常念佛
不久當成佛	諸佛善護持
其人自不知	我當生淨土
却要來後世	再得生人中
譬如貧人家	地內有伏藏
藏神常守護	不令其有失
貧人自不知	家內有寶藏
逐日趨客作	求衣食自濟

今此念佛人	其意亦如是
不知念佛人	具足如來藏
自說我無分	逐要生人中
譬如病人家	自有真妙藥
不知妙藥性	不能自治病
<small>素羹</small>	<small>六</small>
每日床枕邊	痛苦受無量
今此念佛人	其意亦如是
不知念佛心	能滅貪瞋病
能為大醫王	能為大寶藏
利濟一切人	能為大法王

覆護一切衆  
 不得生淨土  
 後世願爲人  
 方可生彼國  
 常作如是說  
 不合淨土經  
 畢竟難出離  
 皆是自障心  
 一蹉是百蹉  
 信我如來說

將爲是凡夫  
 且自持齋戒  
 展轉更修行  
 多見修行人  
 不稱彌陀願  
 邪見障覆心  
 非是他人障  
 今世不得生  
 勸汝修行人  
 佛無不實語

豈是虛誑言  
 一心求淨土  
 用力不消多  
 回願超三界  
 遇食受饑寒  
 不見真實意  
 展轉傳與人  
 作於如來使  
 真名報佛恩  
 同生極樂國

但當自精勤  
 因風吹於火  
 幸有念佛心  
 逢寶不取寶  
 咄哉大丈夫  
 我今畧勸讚  
 代我廣流通  
 真是諸佛子  
 普願如說行

求生淨土要在發願

智度論第八卷問曰諸菩薩行業清淨自得勝報何必要立誓願然後得之且如田家得穀豈復待願耶答曰作福無願無所標立願爲導御能有所成如佛所說若人修少福少戒不知解脫正因聞說人天之樂心常願樂命終之後各生其中此皆願力所致菩薩求生淨土在乎志願堅強然後得之以此故知因彼願力得受勝果古德云佛果負絕登之則有階法雲峻極屆之則有漸大心初發玄

德照於來生弘誓纒與妙願徧於空界一念興志即塵劫之瑞華半刻虔躬乃大千之甘露大莊嚴論云佛國八事獨行功德不能成就要須願力資助引而成之以願力故福德增長不失不壞當生佛土隨願見佛華嚴經云是人臨命終時最後剎那一切諸根悉皆散壞一切親屬悉皆捨離一切威勢悉皆退失乃至象馬車乘珍寶伏藏如是一切無復相隨唯此願王不相捨離於一切時引道其前一剎那中即得往生極樂世界

善導和尚修行發願儀

修淨土入觀及睡時應發此願若坐若立一心合淨正面西向十聲阿彌陀佛觀世音大勢至清淨大海衆菩薩竟發願云弟子現是生死凡夫罪障深重輪迴六道苦不可言今

素共

八

遇知識得聞彌陀名號本願功德一心稱念求願往生願佛慈悲不捨哀憐攝受弟子某甲不識佛身相好光明願佛示現令我得見及見觀音勢至諸菩薩等彼世界中清淨莊嚴光明妙相等令我了了得見發此願已一

心正念即隨意入觀或臨卧發願而睡或有正發願時即得見之或睡時得見位辦專志自然圓滿所願

白侍郎發願求生淨土文

記曰我本師釋迦如來說言從是西方過十萬億佛上有世界號極樂以無八苦四惡道故也其國號淨土以無三毒五濁故也其佛號阿彌陀以壽無量願無量功德相好光明無量故也諦觀此娑婆世界衆生無賢愚無貴賤無幼艾有起心歸佛者舉手合掌必向

西方有怖厄苦惱問口發聲必先念阿彌陀  
佛又範金合土刻石綉紋乃至印水聚沙童  
子戲者莫不率以阿彌陀爲上首不知其然  
而然由是而觀是彼如來有大誓願於此衆  
生衆生有大因緣於彼國土明矣不然則南

素六

九

北東西過去現在未來佛甚多矣何獨如是  
哉何獨如是哉唐中大夫太子少傅白居易  
當衰暮之歲中風痺之疾乃捨俸錢命工人  
杜敬宗按阿彌陀無量壽二經畫西方世界  
一部高九尺廣丈有三尺阿彌陀佛坐中央

觀音勢至二大士侍左右人天瞻仰眷屬圍  
遶樓臺伎樂水樹花鳥七寶嚴飾五彩彰施  
爛爛煌煌功德成就弟子居易焚香稽首跪  
於佛前起慈悲心發弘誓願願此功德回施  
一切衆生一切衆生有如我老者如我病者

願離苦得樂斷惡修善不越南部便觀西方  
白毫大光應念來感青蓮上品隨願往生從  
現在身盡未來際常得親近而供養也欲重  
宣此義而說讚曰極樂世界清淨土無諸惡  
道及衆苦願如我身老病者同生無量壽佛

所

馮濟川施經發淨土願文

其畧曰予之施經一事而具二施何故以財贖經是謂財施以經傳法是謂法施按佛所說財施校世當得天上人間福德之報法施

當得世智辯聰蓋世之報當知此二報者皆是輪迴之因苦報之本我今發願願回此二報臨命終時莊嚴往生西方極樂世界蓮華為胎托質於中見佛聞法悟無生忍登不退階入菩薩位還來十方界內五濁世中普見

其身而作佛事以今日財法二施之因如觀世音菩薩具大慈悲遊歷五道隨類化形說諸妙法開發永悟永離苦道令得智慧普與眾生悉得成佛乃予施經之願也右出捨經碑馮察院施經不求人天路上富貴聰明而

主六

十

以此功德悉回向淨土願見彌陀可謂智識高明深達佛理大乘人也嗟見蓮社人終日念佛而求後世福報豈不謬哉予願一切人同生淨土故舉馮察院施經發願文與諸人作樣子凡有修福念佛乃至一毫之善悉皆

發願回向西方有所歸趣臨終定生淨土也  
廬山蓮宗寶鑑念佛往生正訣卷第八 下三章

念佛往生正訣說

淨土之道往生一門具載群經明如杲日實  
修行者入道之方乃念佛人格神之所無念

之念念即念於阿彌無生之生生則生於淨  
土是故深行菩薩歷代師模名鄉巨儒庶民  
氏女篤信斯道結誓進脩者不可勝計其意  
何哉必欲生淨土見阿彌而後已須知佛本  
無身亦無其土皆衆生心淨所由致感也經

不云乎是心作佛是心是佛諸佛正徧知海  
從心想生故天台大師釋之曰佛本是無心  
淨故有良以衆生心淨則法體現前衆生心  
樂則苦道流轉此乃理之常也又何疑乎以  
圓實教所談唯心本具者若此若彼若染若

素矣

十一

淨皆不越吾心之一念也夫心者造罪之源  
成佛之本所謂介爾有心三千具足然而三  
千諸法既具十界十如三種世間互具而顯  
則安養國土捨此何求非但淨土唯心蓋地  
獄亦唯心矣又云阿鼻依正全趣極聖之自

心身土毘盧不逾下凡之一念纔起悟迷之見便入邪流不分染淨之殊方歸正道刀山劍樹總是空華寶渚金蓮皆成夢事如斯受用始了真修脫或未然宜依權漸而加修進深信阿彌陀佛即我本性貴在禮誦懺念之間行住坐卧之處照於三觀契乎一心全智發境全境是心故知佛正佛依皆是心具心造信哉淨土彌陀昭昭然影現于心日之間譬如磨銅成鏡必假施功直使塵垢淨盡無餘則本體圓明自然顯現一切色孫俱無隱

焉當知鏡中之像若謂是有不可承而攬之若謂是無則色像歷然可見所謂有不定有無不定無有無雙遣任運是中矣我不思議境唯心妙觀之道也欲證斯道必明于因當知因該果海果徹因源原自始要不離一念從因至果只在初心苟能於此善修如是之因至於臨終必獲如是之果是知專心念佛爲因往生淨土爲果始從聞信信以修持積淨業之工夫得功緣之成滿時節既至大理昭然視死如歸豈不慶快故茲直示往生

正訣明指到家路頭此時自信不疑他日出  
門不誤如此則安穩國土何患不生自性彌  
陀決然可見與夫列聖群賢同成淨行歷位  
至極者實惟斯道矣

父母臨終往生淨土

素六

七

諦信淨土發心念佛者蓮池下種時也一心  
念佛衆善莊嚴者蓮華出水時也念佛功成  
淨土緣熟華開見佛時也佛子事佛固先事  
親奉孝孝念不捨須臾順父母之情懷察父  
母之顏色纔乘攝養力爲調和又當念風燭

不停須防往生時至預以父母平生所修一  
切善緣好事及衆人助修功德聚爲一疏時  
時對父母讀之要令父母心生歡喜又當勸  
令坐卧西向不忘淨土又當東向設彌陀像  
勸令一心念佛焚香鳴磬躬率衆人同聲和  
之常使佛聲相續不絕無以世情悲戀恐失  
正念臨捨報時猶當用意自然諸聖來迎往  
生淨土寶蓮花中決定成佛孝子侍養父母  
正在此時不宜懈怠此孝子事親臨終之大  
事也以此爲孝其孝至矣又况從古以來念

佛往生西方者非一畧舉數條以為念佛者  
鑑所以為長國主觀衆神以來迎隋文皇后  
乘異香而西邁姚行婆請佛相待宋世子侍  
母同歸可謂一超直入如來地矣

臨終三疑

表六

慈照宗主淨土十門告誡云念佛人臨終三  
疑不生淨土一者疑我生來作業極重修行  
日淺恐不得生二者疑我欠人債負或有心  
願未了及貪嗔癡未息恐不得生三者疑我  
雖念彌陀臨命終時恐佛不來迎接有此三

疑因疑成障失其正念不得往生故念佛之  
人切要諦信佛經明旨勿生疑心經云念阿  
彌陀佛一聲滅八十億劫生死重罪上至一  
心不亂下至十念成功接向九蓮令辭五濁  
苟能心心不昧念念無差則疑情永斷決定  
往生可謂十萬億程彈指到絲毫擬議隔千  
山

臨終四關

四關者慈照宗主淨土十門告誡云凡夫雖  
有信心念佛緣為宿業障重今墮地獄乘佛

力故於床枕間將輕換重若也因病苦故悔  
悟身心當生淨土也無智之人不了此事却  
言我今念佛又有病苦反謗彌陀因此一念  
惡心徑入地獄此是一關也二者雖則持戒  
念佛緣為口談淨土意戀娑婆不求出世善

根為愛家緣長旺以致臨終遭病怕死貪生  
信受童兒呼神喚鬼燒錢化馬殺戮衆生緣  
此心邪無佛攝護因茲流浪墮落三塗是二  
關也三者或因服藥須用酒釀或被親情逆  
相逼勸此人無決定信喪失善根臨終追赴

王前任三判斷是為第三關也四者臨終之  
際思惟活業繫綴資財愛戀眷屬心放不下  
失却正念故於家舍墮鬼趣中已為禍祟或  
為慳犬或作蛇身守護家庭宛如在日是為  
四關也是以楊提刑言愛不重不生娑婆念

素六

十四

不一不生淨土誠哉是言凡修淨土者要當  
酌實無浮思專想寂念念彌陀全身放下但  
能堅此一念便可碎彼四關則淨土蓮臺的  
非遙矣可謂一句彌陀無別念不勞彈指到  
西方

臨終決疑撮要

凡修人念佛之人欲生淨土每念世間一切無常成必有壞生必有死若不親聞佛法則捨身受身輪轉三界四生六道無解脫期我今有緣得聞王法得修淨業唯佛為念捨此報

身當生淨土入彼蓮胎受諸快樂永脫生死不退菩提此乃大丈夫平生之能事也縱有疾病正要向前坦蕩身心莫生疑慮直須西向正坐專想阿彌陀佛與觀世音大勢至菩薩及無數化佛現在其前一心稱念南無阿

彌陀佛聲聲不絕於諸世間一切事務不得思念不得貪戀若或心念起來但要急稱佛號於念念中除滅罪障若病人昏困不能自念則看病人當方便警策勸而諭之如此用心助令命盡只此一念決定往生淨土命若

素六

十五

未盡自得安寧慎勿妄起留戀世間之心當存自存當死須死但辦往生何須疑慮若解此理如脫弊服以着上衣一捨凡身便登佛地奇哉偉哉至矣盡矣或聞天樂異香或見金蓮寶座此乃聖境現前慎勿疑為魔事經

云修淨業者托佛願力觀佛寶相爲境故如人近附帝王誰敢干犯此阿彌陀佛有大慈悲力有大誓願力有大智慧力有大三昧力有大威神力有大摧邪力有大降魔力有天眼遠見力有天耳遙聞力有他心徹鑑力有光明遍照攝取衆生力有如是等不可思議無量最勝功德之力豈不能護持修行念佛之人至臨終時令無魔障生淨土哉可謂粉骨碎身未足酬一句了然超百億

僧濟臨終注想西方

廬山尊者弟子僧濟臨終之際尊者遺燭一枝曰汝可運想西方濟執燭注想金容攝心無亂復請僧衆誦十六觀經五更濟以燭授同袍遂假寤及寤曰吾夢見阿彌陀佛垂手接引吾當去矣言訖右脇而逝此非戒定慧之所熏修而豈能溫容輒語於生死岸頭耶可謂得路便行無罣礙等閑抹過死生關

善導和尚臨終往生正念文

知歸子問曰世事之大莫越生死一息不來便屬後世一念差錯便墮輪迴小子累蒙開

誨念佛往生之法其理甚明又恐病來死至之時心識散亂仍慮他人感動正念忘失淨因伏望重示歸徑之方俾脫沉輪之苦師曰善哉問也凡一切人命終欲生淨土須是不得怕死常念此身多苦不淨惡業種種交纏

素六

六

若得捨此穢身超生淨土受無量快樂解脫生死苦趣乃是稱意之事如脫弊衣得換珍服但當放下身心莫生戀着凡遇有病之時便念無常一心待死叮囑家人及看病人往來問候人凡來我前爲我念佛不得說眼前

開雜之話家中長短之事亦不須軟語安慰祝願安樂此皆虛花無益之語若病重將終之際親屬不得垂淚哭泣及發嗟嘆懊惱之聲惑亂心神失其正念但一時同聲念佛待氣盡了方可哀泣纔有絲毫戀世間心便成

星礙不得解脫若得明曉淨土之人頻來策勵極爲大幸若依此者決定超生即無疑也又問曰求醫服藥還可用不答曰求醫服藥初不相妨然藥者只能醫病不能醫命命若盡時藥豈柰何若殺物命爲藥以求身安此

則不可余多見世人因病持齋方獲小愈復  
為醫者以酒食血肉佐藥其病復作信知佛  
力可救酒肉無益也又問曰求神祈福如何  
荅曰人命長短生時已定何假鬼神延之耶  
若迷信邪殺害衆生祭祀神鬼但增罪業

素

七

反損壽矣大命若盡小鬼奈何空自悵惶俱  
無所濟切宜謹之當以此文帖向目前時時  
見之免致臨危忘失又問曰平生未曾念佛  
人還用得否荅曰此法僧人俗人未念佛人  
用之皆得往生決無疑也余多見世人於平

常念佛禮讚發願求生西方甚是勤奉及至  
臨病却又怕死都不說着往生解脫之事直  
待氣消命盡識投冥界方始十念鳴鐘恰如  
賊去關門濟何事也死門事大須是自家着  
力始得若一念差錯歷劫受苦誰人相代思

之思之若無事時當以此法精進受持是為  
臨終大事可謂一條蕩蕩西方路徑直歸家  
莫問津

化佛來迎

宗鏡錄或問曰心外無佛見佛是心云何教

中說有化佛來迎生諸淨土答曰法身真佛本無生滅從真起化接引迷根以化即真真應一際即不來不去隨應物心又化體即真說無來去從真流化現有往還即不來相而來不見相而見也不來而來似水月之頻呈

不見而見猶行雲之忽現問如上所說真體即湛然不動化相即不來而來正是心外有他佛來迎云何證自心是佛答曰此乃是如來本願功德力故令彼有緣衆生專心想念能令自心見佛來迎不是諸佛實遣化身而

來迎接但是有緣時機正合能令自心見佛來迎則佛身湛然常寂無去無來衆生識心託佛本願力一念變化有去有來如鏡面像似夢施爲鏡中之形非內非外夢中之事不有不無但是心生非關佛化真信修行之士

素六

七

端的是要生西方極樂世界專一意念持一句阿彌陀佛只此一念是我本師只此一念即是化佛只此一念是破地獄之猛將只此一念是斬群邪之寶劍只此一念是開黑暗之明燈只此一念是度苦海之大船只此一

念是脫生死之良方只此一念是出三界之徑路只此一念是本性彌陀只此一念達唯心淨土但只要記得這一句阿彌陀佛在念莫教失落念念常現前念念不離心無事也如是念有事也如是念安樂也如是念病苦

也如是念生也如是念死也如是念如是一念分明不昧又何必問人覓歸程乎可謂行船盡在把稍人達者同遊涅槃路

賢首菩薩臨終讚念佛偈

又放光明名見佛 此光覺悟將終者

永樂北藏

廬山蓮宗寶鑒

第一九五冊

令隨憶念見如來

命終得生其淨國

見有臨終勸念佛

及示尊像令瞻仰

俾於佛所深歸信

是故得成此光明

天竺慈雲式懺主云前四句讚佛放光見其光者名爲見佛能令臨命終時淨土往生後

素六

九

四句讚佛修此光明之因其因者祇是勸臨終人念佛并示其佛像令彼見已生信故成佛時得此光明令以偈普勸信受凡遇眷屬及一切人臨命終時先於床前安置此像令彼眼見及勸令念佛若痛苦所逼或先無信

心不肯念者亦須種種方便勸令稱佛下至十念得滅重罪生佛淨土此一利益不可思議若勸得一人生淨土縱自不修行亦合得生淨土况當來成佛能放光明照一切衆生臨終見佛也多見世人爲恩愛故聚頭哭泣不思救度是名惡知識也苦哉苦哉恩愛所牽墮落惡道無解脫期雖慈親孝子亦不奈何以此思之可不勉哉可謂普願沉溺諸衆生速往無量光佛刹

情想多少論報高下

首楞嚴經云佛告阿難一切世間生死相續生從順習死從變流臨命終時未捨煖觸一生善惡俱時頻現純想即飛必生天上若飛心中兼福兼慧及與淨願自然心開見十方佛一切淨土隨願往生情少想多輕舉非遠即爲飛仙情想均等不飛不墜生於人間想明斯聰情幽斯鈍情多想少流入橫生重爲毛群輕爲羽族七情三想沉下水輪生於火際受氣猛火身爲餓鬼常彼焚燒水能害已無食無飲經百千劫九情一想下洞火輪輕

生有間重生無間二種地獄純情即沉入阿鼻獄若沉心中有謗大乘毀佛禁戒誑妄說法虛貪信施濫膺恭敬五逆十重更生十方阿鼻地獄

命終善惡感報優劣

素六

干

守護國界主經云佛言若人命終之時預知時至正念分明洗浴着衣吉祥而逝光明照身見佛相好衆善俱現定知此人決定往生淨土若人念佛持戒無精進心命終亦無善相亦無惡相地府不收安養不攝如睡眠去

此人疑情未斷生於疑城五百歲受樂再修信願方歸淨土若人起憐憫心正念現前於財寶妻子心無愛戀眼色清淨仰面含笑想念天宮當來迎我耳聞天樂眼見天童捨此報身定生天界若人生柔軟心起福德心身

無病難憶念父母妻子於善於惡心不錯亂其心正直遺囑家財辭別而去定生人界若人於已眷屬亞眼瞻視舉手捫空便利不覺身常臭穢兩目紅赤仆面而卧跪身左脇百節酸疼或見惡相口不能言伸吟叫喚冤債

現前心識散亂狂惑顛倒徧體如水手捻死  
 拳身硬如石此人命終定入地獄若人好  
 其唇身熱如火常患鐵渴好說飲食張口不  
 合貪戀財寶命卒難斷開眼而去此人定入  
 餓鬼若人身染重病如在雲霧心神昏散怕

素六

王

聞佛名多愛食噉血肉之味不受勸化愛戀  
 妻兒躩手足指徧身汗出屢澁聲口中咀  
 沫此相現前定入畜生

臨終十事不尅念佛勸預修

凡夫業重處處貪生若不預辦工夫臨終不

尅念佛天台十疑論云臨終念佛名最後心  
 其心猛利一念佛名即生淨土蓋垂死時其  
 心猛健決定故勝百歲行力也或問曰臨終  
 念佛即得往生何假預修勝業答曰人生壽  
 夭難測短長或即病困昏迷或即非時奄逝

既闕生前之善難逃後世之殃須預作於善  
 緣是恐防於斯答十種命終不尅念佛一者  
 善友未必相逢二者或疾苦纏身神昏性亂  
 三者偏風失語不得稱名四者狂亂失心注  
 想難尅五者或逢水火不暇志誠六者輒遇

虎狼驚惶倉卒七者臨時惡友破壞道心八  
者飽食過多昏迷致命九者軍件鬪戰忽爾  
身亡十者或墜高岩傷中身命故知臨終難  
保吉凶須是預先脩習可謂閑時做下急時  
用免得臨期手脚忙

廬山蓮宗寶鑑念佛正報卷第九

永樂北藏

廬山蓮宗寶鑒

第一九五册

廬山蓮宗寶鑑念佛正報卷第九

素七

東林禪寺蓮宗善法祖堂勸修淨業巨僧普度謹自編集

念佛正報說

因修白業果感淨方化佛引上金臺賢聖迎  
歸樂國高超三界迥出四流業盡塵消亡情

素七

絕慮質托蓮苞之內神遊寶界之中面奉阿  
彌陀佛為本師得見觀音勢至為親友清淨  
海眾大會寶池九品勝流各說本行五香拂  
體三德嚴身暫扇微風聆眾音之演法繽紛  
花雨靚燄網之舒光縹緲雲霞近浮神足輕

盈衣祴盛接妙華晨謁慈顏得法印而還國  
暮遊金剎聽玉偈以逍遙瑞蓮初綻為遺殘  
映新學化生行成不退豈惟近忘塵苦抑亦  
佛果非遙戲翫瓊林灌沐德水百寶之樓閣  
華嚴七重之行樹森嚴景序長春地平如掌  
衣食隨念而至天樂不鼓自鳴受用出於自  
然快樂實非人世諸天萬億倍不可比論諸  
佛恒河沙悉皆稱讚身具光明妙相跡踐聖  
道香階壽命難量悲願無盡捨兩重生死既  
非果趣之身獲本際常光離去來之相緣強

德勝皆由念佛心生福備壽長盡是淨因感報故知佛有攝生之願生有感佛之因如是勝緣起於信願以斯妙果成就正依或禪誦七寶池邊或經行黃金地上飽禪悅法喜珍味掛慈悲喜捨天衣功德資神增加悲智雍

容辨道長養聖胎入無生門便登菩薩之位得阿跋致不退菩提之心住法王家盡授如來之記聞大乘法同稱補處之尊念念虛玄心心靜慮得三昧正定具六種神通獻供十方徃來無碍分身億刹不失定心淨法水於

三千出衆生於火宅自他兼利行願周圓可謂百千三昧盡唯心功德莊嚴歸自己

功德莊嚴

大彌陀經菩薩功德章云往生彼國者皆悉容貌柔和相好具足禪定智慧通達無礙神

素

二

通威德無不圓滿深入法門具無生忍諸佛秘藏究竟明了調伏諸根身心柔軟安然寂靜盡般泥洹深入正慧無有餘習依佛所行七覺聖道修行五眼照真達俗辯才總持自在無礙善解世間無邊方便所言誠諦深入

義味敷演正法度諸有情等觀三界空無所  
有知一切法無相無爲無取無捨遠離顛倒  
堅固不動如須彌山智明如日廣大如海出  
功德寶熾盛如火燒煩惱薪忍辱如地一切  
平等清淨如水洗諸塵垢如虛空無邊不障

一切故如蓮花出水離一切染故如雷震響  
出法音故如雲鬘降法雨故如風動樹發  
菩提芽故如牛王聲異衆牛故如龍象威難  
可測故如良馬行乘無失故如獅子王無怖  
畏故如尼拘律樹覆蔭大故如優鉢羅華難

值遇故如金剛杵破邪山故如梵王身生梵  
衆故如金翅鳥勝毒龍故如空中禽無住跡  
故如雪山照功德淨故如慈氏觀法界等故  
專樂求法心無厭足常欲廣說志無疲倦擊  
法鼓建法幢曜慧日除癡冥修六和敬常爲

卷

三

師導爲世明燈最勝福田以安羣生功慧殊  
勝莫不尊重恭敬供養無量諸佛常爲諸佛  
所共讚嘆究竟菩薩諸波羅密遠離聲聞緣  
覺之地佛告阿難彼諸菩薩以念佛故成就  
如是無量功德我但爲汝舉要言之若廣說

者雖盡億劫不能窮盡

淨土增修聖果

大彌陀經云諸念佛人生淨土已即入七寶  
池中凜雪形體蕩滌情慮各坐一華上自然  
微風吹動諸寶行樹出微妙音散諸寶華異

香芬馥皆作佛事聞者喜悅無量自然心開  
各往修進有在地講經者有在地誦經者有  
在地說經者有在地口授經者有在地聽經  
者有在地念經者有在地思道者有在地坐  
禪一心者有在地經行者有在虛空中講經

者有在虛空中誦經者有在虛空中說經者  
有在虛空中口授經者有在虛空中聽經者  
有在虛空中念經者有在虛空中思道者有  
在虛空中坐禪一心者有在虛空中經行者  
其間聲聞弟子皆發大心有未得聖果者因  
是而得聖果有未得不退轉地者因是而得  
不退轉地菩薩各隨其資而有所得莫不忻  
然適意而悅遊戲三昧利樂有情由念佛之  
堅心稱彌陀之本願往生佛子同列此班智  
慧辯才神通如意風帆勢順速證菩提超萬

劫之輪迴得諸天之仰重淨業勝善大果昭然寄語同流無忘此事顛動蜎飛猶有分大丈夫兒當勉旃

淨土三十益

天台智者大師淨土羣疑論云生西方者有

素七

四

三十種益一往生佛土益二得大法樂益三親近諸佛益四遊歷十方供佛益五親聞佛說益六福慧資糧疾得圓滿益七速證菩提益八諸天人等同集一會益九無退轉益十無量行願增進益十一鸚鵡舍利宣揚法音

益十二風樹樂響益十三摩尼水漩演苦空益十四諸樂奏妙音益十五四十八願益十六真金色身益十七形無醜陋益十八具足六通益十九常住定聚益二十無諸不善益二十一壽命長遠益二十二衣食自然益二十三唯受衆樂益二十四三十二相益二十五實無女人益二十六無有小乘益二十七離於八難益二十八得三法忍益二十九身常有光益三十得那羅延身力益可謂處處菩提道明明功德林

淨土成佛

金剛定後菩薩因圓解脫道中如來果滿具  
四無量心得四無礙辯十八種法不共二乘  
十力現前說法無畏塵沙惑盡萬行功成十  
號俱彰三身圓顯具九十七種大人相放八

素七

五

萬四千大光明悲智俱融福慧雙足現居十  
重報土能垂萬類化身布大慈雲兩大法兩  
滂流法界潤澤群生成悟本心同成正覺○  
選佛若無如是眼宗風那得到如今  
廬山蓮宗寶鑑念佛正報卷第九

廬山蓮宗寶鑑念佛正論卷第二十五章

念佛正論說

夫奉教念佛之士叨法王之遺蔭作如來之  
所使必以摧邪顯正激濁揚清為後學著龜  
作生靈耳目為已任也苟弗能而默默自守  
則尸祿構員於佛門矣雖講授亦奚以為豈  
不聞因筌然後得魚體教然後修行名教未  
正行如之何哉故不得不論也是以仲尼為  
政正其不正涅槃遺誡急在糾過余嘗觀吾  
佛世尊之王西竺也象無象之象言無言之

言以復羣生之性由是頓教漸教大乘小乘  
盈溢乎龍宮海藏無非摧邪顯正激濁揚清  
之旨而大地生民率其化而復其性者可勝  
計乎其間偏讚西方謂捷徑修行之道者蓋  
以阿彌陀佛有廣大願力攝娑婆衆生而歸  
淨邦是令反妄而證真也所以諸佛共讚菩  
薩同遵晉社創修千古之高風不墜慈照集  
懺十方之正化流通大矣哉淨土之道其爲  
體也以彌陀即本性其爲宗也以淨國即唯  
心其爲用也以仁恕即滅惡生善此之三者

蓋顯三世報應制其事一心空寂窮其理俾  
達乎理者反其妄信其事者遷乎善以斯而  
利于上下實助於周孔之教贊翊皇化其亦  
至矣使一人能行是道以訓于家家以導於  
鄉鄉以達於邦以至於無窮則天下之民涵  
道泳德融神實相高步無何而極佛境界豈  
止以爲善人君子而已哉夫如是則何患乎  
忠孝不修禮讓不著歟以此觀之豈非能仁  
之道與仲尼之道共爲表裏以訓于民耶洎  
乎歷朝敬之廣其教像法事之非其人廣其

教則弊倖生非其人則淳朴泯而乃以佛堂  
高大爲奢誇聲利溫飽爲能事徒以多爲貴  
則壞其道者衆矣言以怪爲美則惑其聽者  
庶矣迺相訟襲以成鄙吝日復一日紅紫亂  
朱使夫清靜仁恕之風消蕩矣於是蚕食蠹  
耗之謗由茲而盛焉斯乃敬之事之者之失  
非其教之咎也今之人多不察其所由視其  
徒之不肖者而遷怒於善人教法焉亦何異  
乎以丹朱而罪堯因商均而過舜服藥失度  
歸咎於神農縱火致焚反怨於燧人也耶愚

乃不佞學佛之道有年矣既粗領其旨而頗  
有扶傾之心非敢私於己而欲公於衆以救  
其弊也嘗謂教門之利害有四一曰師授不  
明邪法增熾而喪其真二曰戒法不行綱常  
紊亂而犯其禁三曰教理未彰謬談非義而  
惑其衆四曰行願不修迷入邪岐而墮於魔  
由是亂名改作聾瞽後學非止一端可傷乎哉自  
是叨濫之徒一以傳十十以傳百百以千萬  
流毒於海內速若置郵何以知其然正說難  
行邪風易染此必然之理也噫祖道之不傳

也。又矣。欲人之無惑者難矣。吾雖不敏而實悲焉。思欲分條析理。廣被前聞。截偽續真。開茲後學。恨無慧辯。徒事管窺。由是齋沐一心。投誠三寶。詢求大教。參考玄文。指定正宗。破諸異說。總成念佛正論。剖證佛祖格言。普告諸方。咸躋覺路。庶使聖教隱而復彰。衆生罪而還福。有客至而問之。曰。修行了自己。生死何須論他人。長短予應之。曰。理不然也。豈不聞如來出世無一法。不是利生菩薩修行。肯纖毫而爲自己。佛子。示同外道方便。轉彼邪

心。楞嚴十種魔民。皆因錯解華嚴十類魔業。示其正歸。嗟惡慧之邪修。自甘心於險道。遇斯境界。豈可滅言念。彼愚癡空容坐視。况世尊悲心付囑。留大願而普濟。迷津菩薩如教修行。示同事而化令成佛。是其本行。夫復何疑。如其見迷路而不指正途。慈悲安在。觀沉溺而不思拯接。方便何存。隨順正法而破魔。是無上大智之業。調伏衆生而入道。是諸佛之所攝持。誓當捨命而立真宗。終不已而忘佛囑。衆生盡而悲心益固。空界頽而我願無

窮倘逢有識之賢必能助弘斯道可謂得此  
深心奉塵刹是則名為報佛恩

西方彌陀說

佛說西方極樂世界其土有佛號阿彌陀如  
經所載有理有迹論其理者西方即自性也

素

此性無形無相不變不壞歷劫空到譬彼精  
金在易卦則曰兌為寂靜故謂之西方也金  
者其色明金體白淨舉之喻法性蓋世間之  
人迷於塵境妄念不息紛然動作在易卦則  
曰震故謂之東方也人能反妄歸真復其本

靜得見自性即名捨東方執着之穢土登西  
域淨明之金地也在方無方以法喻表其理  
體華嚴合論謂文殊自東方來者蓋文殊是  
根本不動智也東是萬物發生震動之者初  
明之地從此智則生信故華嚴以信位為初  
生佛家丑寅之間為清靜智日初明像文殊  
發起九夫入信見道智門漸增故巽為風為  
教化風能穢揀淨辰巳之間上應角宿為僧  
道為齋戒為衆善之門喻進修地位至午為  
中道易卦曰離為南方為正為日為明麗離

中虛故明像諸法空則智日當陽徧照天下  
法華龍女南方成佛是其義也西南為坤為  
地為安靜為柔順為母為生養正西為兌金  
旺之地日沒之所火死在酉為肅寂為收藏  
西北為乾為天為父為金為剛健北方為坎  
為水為君為師利生濟物垂教正治以水制  
火以君對臣臣明君正又水多則濫故東北  
為艮為山為止下方為禪定為謙下上方為  
觀照為智慧為空界如日月三光處空照臨  
萬物也經中不舉餘方而單指西方者蓋取

素七

九

淨對穢也以悟攝迷以靜對動也以果對因  
也過十萬億國土者出四維上下十方之限  
量也超乎四惡道之十惡業也越乎八天十  
善之境界也不為諸法之所拘也有世界者  
真如實際理地即自性西方極樂者即言此  
性無憂惱也何以知其然見性之人不為塵  
境惑了知諸法空心常坦然無念無為無思  
無慮安住大寂滅之地念念常生智慧法法  
皆如我為法王於法自在故名極樂也論其  
迹則實有此箇世界也佛叮嚀詳復言之豈

虛哉有者非方域處所之有乃不有之有即  
 是真空妙有也真空者即是實相妙有者森  
 羅眩目法界交參豈有東西之辨哉圓覺經  
 云一切如來光嚴住持是諸眾生清淨覺地  
 平等本際圓滿十方不二隨順於不二境現

諸淨土阿彌陀是梵語此云無量壽也佛者  
 覺也即當人分上廣大圓覺之性清淨法身  
 之佛也此性不生不滅亘古亘今上至諸佛  
 菩薩下至六道眾生各各具此覺性所以稱  
 同名同號也噫世人昧之久矣妄取色相顛

倒馳求甘自沉淪我佛應世開方便門讚說  
 淨邦令其信慕苟能自肯自信方悟堅明為  
 西方盡西矣惑火滅盡土皆淨焉則知十方  
 世界總是彌陀觸目遇緣無非極樂百千三  
 昧應念現前無量法門隨心顯發高超徹見

素七

十

是樓閣含育利生名宮殿防非護善名欄楯  
 清淨無染是蓮華徹底澄清謂之池隨方逐  
 圓謂之水仁慈濟利謂之寶戒定慧薰謂之  
 香七菩提樹覆蔭重重八聖道路遊行坦坦  
 衆善莊嚴花簇秀萬德成就果周圍化禽演

於法音風樹傳於道品到這般田地更要保  
持涵養直至命終永無退失脫然而去方爲  
了事其或未然切不可遺山認培弃寶捨新  
妄認色身便爲究竟信知生死事大莫作等  
閑尋訪真知決擇心要確實念佛求悟大乘  
了見本性彌陀直達唯心淨土可謂雖然舊  
閣閑田地一度贏來方始休

真如本性說

真如本性者父母未生已前一真無妄之體  
謂之本來面目禪定則曰正法眼藏蓮宗則

曰本性彌陀孔子則曰天理大易則曰太極  
名雖有異其實同一真如本性也此性虛而  
靈寂而妙與天地同根萬物一本歷塵劫而  
不朽世界壞而不遷人不能任其自如之真  
而枯於地水火風和合之質方其受形也已

素七

十一

爲陰血濁氣昏其本然清淨之體及其生也  
六塵五欲之迷倒昧於本有之天真是故佛  
說八萬四千法門皆是導人反妄而歸真也  
其捷徑易行者惟念佛一門修之者心不散  
亂三昧現前是復其本性也今有一等不究

佛理之人却將道門修養法冒濫蓮宗妄說  
氣是主人教人般精運氣勞其筋骨柱用身  
心甘受苦辛終無所濟嘗觀道門張紫陽說  
精氣神者先天地之元精元氣元神也元精  
非淫泆之精元氣非呼吸之氣元神非念慮  
之神癡人不曉此意喚甕作鍾眼既不明理  
亦不達矯誘他清信之士一向在臭皮袋上  
造作昧却一真佛性妄言此是修行可悲也  
我普告同修切宜仔細究心念佛啟悟真源  
若也了了自見法法現前是名見性成佛一

念差錯天地懸殊

辨真妄身心

夫身者有法身有色身傳曰智明真境盡法  
為身故曰法身父母緣生虛幻不實故曰色  
身心者有真心有妄心真淨明妙虛徹靈通  
故曰真心隨境生滅忽有忽無故曰妄心祖  
師勸修念佛三昧者於自己真心中流出一  
句阿彌陀佛念念觀照法法圓通是謂都攝  
六根淨念相繼於一念中普現色身三昧今  
時有一等人不知真妄錯認色身為我身以

妄念爲究竟多是吐納按摩做模打樣希望成道不亦謬乎何謂弃却真金而拾瓦礫也大凡學道要辨真偽故宗鏡云修道以心爲宗理須仔細究竟約有情界真妄似分不可雷同有濫圓覺金鑛共熱真偽纔分沙米同

素七

十二

炊生熟有異三乘慕道見有差殊錯指妄心以爲真實認妄賊爲真子劫盡家珍收魚目作驪珠空迷智眼遂使愚癡之子陷有缺之重關邪險之人溺見河之識浪戲熾焰於朽宅忘苦忘疲卧太夢於長宵迷心迷性皆由

執斯緣慮作自己身遺此真心住他聲色斯則凡夫外道之失也或有法學禪宗執佛方便致使撒開八網乘對四機越一念而遠驟三祇功虛大劫離寶所而久淹化壘跡困長衢斯則迷循妄心不得真心之失也心賦云性非造作理實鑄融明之者即動而靜昧之者迷西作東任竭海移山未是無爲之力縱躡虛履水皆爲有漏之通辨玉須真探珠宜靜若向境外以求心焉知圓光而在青順法界性合真如心此則頓入如來大慈悲海比

之著相修皮袋者豈可同日而語矣

辨明三寶

教云十方薄伽梵圓滿修多羅大乘菩薩僧功德難思議三寶者有三種一曰同體三寶謂真如之理自性開覺名爲佛寶德用軌則

素七

十三

自性正真名爲法寶動無違諍自性清淨名爲僧寶二曰出世三寶謂法報化身隨類應現是爲佛寶六度詮旨四諦緣生名爲法寶十地菩薩四向五果名爲僧寶三曰世間住持三寶謂泥龕塑像名爲佛寶黃卷赤軸名

爲法寶剃髮深衣名爲僧寶皈依者感諸天護持供養者獲福田無量今有邪愚不鮮僞撰真宗妙義經妄言精是佛寶氣是法寶神是僧寶迤相傳習致使入善門者信其邪說不敬三寶實可憐憫若夫不敬世間三寶則

自昧其心自昧其心則迷失本性同體出世三寶何所得哉自昧猶可又他人可謂岐人天之正路瞎人天之正眼昧因果之真教澆定慧之淳風無甚於此也佛言一切衆生若不皈依三寶永劫墮三惡道况我慈照集經

成懺使學者依大乘經甚深妙義從今身至  
佛身為法界衆生皈依常住佛皈依常住法  
皈依常住僧正信善人既已得聞聞已誦禮  
固當自敬自信即此敬信之心端可近於佛  
道矣凡見一切佛像起如來想見一切聖教

生難遣想見一切比丘僧起祖師懺禮拜供  
養無得輕欺以佛莊嚴而自莊嚴如此則一  
體三寶唯心備具矣若也執於鄙見昧其根  
本妄信邪教疑誤後人自取沉淪永溺惡趣  
是誰之咎歟

辨見聞覺知

古德云在胎為身處世名人在眼曰見在耳  
曰聞在鼻嗅香在舌談論在手執捉在足運  
奔編現俱該沙界收攝在一微塵識者知是  
佛性不識喚作精魂比來有等愚人不知佛

素七

十四

理潛吾教中專以傳受為宗妄說六門見性  
指四大色身以為佛體自立三十六關七十  
二信捏合恠事誑惑善人妄謂這邊肉動某  
人來那裏疼痛某事至吉凶禍福言是先知  
愚者得聞將謂佛法靈感傾心諦信布施供

養傳此邪言切切記心未嘗暫捨殊不知一  
 真佛性清淨湛然為有妄身乃有妄識蓋覆  
 本性不見光明一念心空名為悟道故楞嚴  
 云知見立知即無明本知見無見斯則涅槃  
 是故祖師立教但以念佛三昧為正宗未嘗

有毫髮許實法繫綴於人何期蚩蚩薄俗迷  
 宗昧旨棄忠孝而不履背仁義而不修假蓮  
 宗之名行差別之法貪求冥感以奇怪惑人  
 則有邪魔魍魎附人身體枕亂正信盡遭魔  
 攝可不悲哉大凡修淨業人善察邪正本分

究心確辨信誠憶佛念佛願生淨土慎勿他  
 求智覺壽禪師云莫摘枝苗須搜祖禰豁爾  
 而無明頓開湛然而情塵自洗可謂直截根  
 源佛所印摘葉尋枝我不能

破妄說灾福

卷七

十五

夫佛祖正法以本性彌陀為體念佛信願為  
 宗自行化他為用乃佛祖之格言後人之龜  
 鑑凡曰音聲佛事點燭道場蓋是方便法門  
 以之引權歸實耳比來學者迷失宗旨貪著  
 事相不遵教典向外妄為心眼不明競稱師

長實法門中一弊事也或搜鬼竅有若師巫  
或稱彌勒下生或言諸天附體或向燭光上  
見神見鬼或在香烟上斷吉斷凶瞞昧三光  
欺賢罔聖誑諱闖閻邀求利養及乎問他平  
實行願杜口無言本性彌陀罔知下落熟亂

一生盡是虛誑誤人自誤實可悲哉故楞嚴  
經云善男子心愛懸應爾時天魔候得其便  
飛精附人口說經法訐露人事不避讒嫌口  
中好說未然禍福及至其時毫髮無失是人  
愚迷惑爲菩薩親近供養破佛律儀潛行貪

欲此名歷劫精魅大力鬼神年老成魔惱亂  
是人不知魔着謂言證聖厭足心生去彼人  
體師及弟子俱陷三難汝當先覺不入輪迴  
迷惑不知墮無間獄嗟乎初心善人不知真  
偽信彼邪說不務存心積德妄想求福見之

譏焉吾聞積善之家必有餘慶積不善之家  
必有餘殃故知吉凶禍福繫乎人心烏可諂  
求富貴而苟免禍害哉永明壽禪師云惡從  
心起如鏡孕垢而自毀鏡形善逐情生如珠  
現光而還照珠體故吾勸諸善人舉心用事

必擇道而行之擇禮而從之擇友而交之擇里而處之擇師而事之兢兢焉而存心戰戰焉而守節念念不昧無失於順天之道以奉西方之教而其觀燭談禍福不與焉

辨明空見

素七

夫

空者破諸有也大覺世尊開示正法欲令一切人識知世間萬法皆空自悟本性之真空也真空者是如來之法界衆生之本心空而不空有而非有悟之者於不有中運出自家寶藏探之無窮用之無盡謂之一乘妙道非

頑空之空也今有一等愚人一向說空撥無因果步步行有口口言無便道飲酒食肉不礙菩提行盜行姦無妨般若縱橫放曠馳逞顛狂謗佛謗經輕毀一切胡揮亂統以當宗乘欺侮聖賢自稱得道如此者滔滔皆是也

永嘉所謂豁達空撥因果莽莽蕩蕩招殃禍非斯類而何耶又楞嚴經云心若着空則有大力空魔入其心腑其人不知是其魔着口說經法潛行貪欲輕毀經像惑亂是人盡遭邪墜魔心生厭去彼人體師及弟子俱陷王

難命終自為魔家眷屬受魔業盡墮無間獄  
嗟乎去聖遠微言絕異端起大義乖不着於  
有則蕩於空着於有則執名相滯有為固物  
我泥怨親縛於近教喪於遠理蕩於空者則  
迷因果混善惡弃戒律背禮義蓋不知中道

卷七

七

之為至善也或曰何謂中道曰有亦不着無  
亦不空空不離有有不離空怨親等為物我  
齊為因果明為善惡分為戒律用為禮義修  
為近教通為遠理至為入矣我中道也妙萬  
物之名乎稱本性之謂乎苟達斯理則不墮

於偏是謂得正受念佛三昧者矣

### 辨一合相

金剛經云如來說一合相者即非一合相是  
名一合相良由世人一性昏迷與塵境相合  
即非一合相智者明見自己真心背塵合覺  
一念覺心與十方諸佛真空法界相合即是  
一合相理也永嘉云我性同共如來合但凡  
夫不悟此理貪着事相妄自堅執情心意識  
與山河大地墻壁瓦礫相合昧却理性之真  
空即非也六祖云心有所得即非一合相心

無所得即是一合相是也今有愚人不識佛法坐吾教中妄說夫婦是一合相者誤矣蓋其情生智隔想變體殊業累殃深背因昧果曲解聖典毀辱教門淨業正宗豈容是說真實修行之士切宜堅秉正信專念彌陀於一

念中不取於相內心外境了了自如自然冥符真理是也故佛果勤禪師示衆云汝等諸人但向十二時中上不見有諸佛下不見有衆生外不見有山河大地內不見有見聞覺知好惡長短打成一片一一拈出更無異見

此則一合相理歷然明矣可謂日可冷月可熱衆魔不能壞真說實履道之通衢乃悟宗之正訣

辯明雙修

雙修者修福修慧也教云修福不修慧象身

素七

六

掛纓絡修慧不修福羅漢應供薄福慧二莊嚴乃能成正覺古德云福不得不作慧不得不學龍舒云修淨土者雖專以念佛爲行門亦須福慧兼修庶得事理兩融也內則修慧究竟涵養深徹淵源使慧性增廣含虛空界

無所不知無不照了外則修福慈悲方便柔和善順利濟世間見一切人平等恭敬隨機說法教化衆生行一切善此是福慧雙修也今有一等愚人常行異教詐稱蓮宗弟子妄指雙修潛通媯穢造地獄業迷誤善人沉迷

欲樂甘墮險坑豈不謬乎是真狐魅妖精何異畜生類也楞嚴云若諸眾生其心不媯則不隨其生死汝修三昧本出塵勞媯心不除塵不可出縱有多智必落魔道上品魔王中品魔王下品魔女諸修行人先斷媯心是名

如來先佛世尊第一決定清淨明誨若不斷媯修菩提者如蒸砂石欲其成飯經百千劫終不名飯汝以媯身求佛妙果縱得妙悟皆是媯根根本成媯輪轉三塗終不能出如來涅槃何路修證必使媯機身心俱斷斷性亦

素七

九

無於佛菩提斯可希冀如我說者名爲佛說不如此說即波旬說今勸在家菩薩依戒修行勿犯邪非清心寡欲雙修福慧回向西方龍舒云修福又修慧深信念阿彌當生上上品決定更無疑其或不然欲飯蒸砂徒費力

擔柴入火定殃身

辯明三車

法華經譬喻品云若有衆生從佛世尊聞法信受慇懃精進求一切智佛智自然智無師智如彼諸子爲求牛車出於火宅故知衆生

喻諸子三界喻火宅三乘喻三車如來見衆生在三界中不得出離說三乘法引令離苦譬如諸子在火宅中嬉戲長者以三車引之令出也有等愚人假說文殊問佛妄稱性是牛車心是羊車意是鹿車又云牛車載妙法

羊車載蓮花鹿車載經所謂醍醐上味爲世所珍遇斯人等翻成毒藥夫法華經者諸法之王佛所護念其可妄議哉何期邪師謬見以非爲是以是爲非法說非法非法說法誑於人謗於佛毀於法豈非負五逆之大罪乎

經云若有誹謗是經典者當知是人入阿鼻獄具足一切劫盡更生如是展轉至無數劫從地獄出當墮畜生謗斯經故獲罪如是細思此等哀哉切心敢以忠言痛告道友於自己心中開示悟入佛之知見則此心清淨如

蓮華關是謂之法華三昧悟斯理者是乘白  
牛車出三界火宅也又不見法達禪師見六  
祖大師呈偈云誦經三千部曹溪一句亡未  
明出世旨寧歇累生狂羊鹿牛權設初中後  
善揚誰知火宅內元是法中王於是曹溪六

素七

二十

祖大師乃說偈以證之云心迷法華轉心悟  
轉法華誦久不明已與義作讎家無念念即  
正有念念成邪若能如是解長駕白牛車是  
若有執迷不省自取沉淪者吾末如之何也  
已矣

### 辯明三關

三關者兜率悅禪師示衆語一云撥草參玄  
只圖見性只今上人性在甚處二云識得本  
性要脫生死生死到來作麼生脫三云脫得  
生死要知去處四大分離向甚處去是故透

此關者則奚拘生死徹此道者豈礙去來自  
是天下叢林宿師大衲靡不洞究淵源故能  
脫白露淨其旨曉然決無異說今有愚人妄  
指人身三丹田作內三關教人般運氣血謂  
之透過三關又曰自足至腰三處疼痛爲外

三闡妄以此處要定臨終時節世多傳習盡入邪路詳觀念佛之教乃簡徑法門祇令修行入於十二時中持一句阿彌陀佛思專根寂更能回光自看阿那箇是我本性彌陀四大分離向甚處去常有此疑焉然識得便知

素七

三

落處即此是直捷省力底修行正道捨此之外稍涉一毫異說即墮在邪見林矣嗚呼廢人背真向偽良可憫焉若也於斯信行截斷露布葛藤豁開透地通天眼覷破邪思妄想心

辨明大小二乘

原夫大法王之垂化也統攝群品各有司存小律比禮刑之權大乘類鈞衡之任營福如司於漕輓製撰者掌於王言在國家之百吏咸修類吾教之群宗競演果明此旨豈執異端應須量已才能隨力演布達則兼濟為善窮則專門是宜雖各播於宗猷而皆處於慈濟同歸和合之海共坐解脫之牀夫如是則迷途之司南教門之木鐸也柰何源遠流別大道澆漓好朱者憎其素愛甘者惡其辛未

契圓宗各擢所據又豈知生佛本一凡聖性均而不能自復者由迷昧於身心致籠檻於生死是知身之過惡非戒律不能檢心之昏散非定慧不能融檢之融之尚慮乎道之不明性之不復况埋沒於邪岐而互相是非也

耶或云我學小乘却又不識戒施禮誦是漸修之法或言我學上乘却又不識本性彌陀唯心淨土之旨不着於事相又墮於頑空大似深村草裏生育之人坐在一隅不知東西南北妄生分別是是非非非是是所謂執

着死蛇頭錯路修行者在穢惡則無所問然於行解不見可畏以至積習成性自滅其身始學慕於上賢終見沉於下惡如斯之輩誠可哀哉永明壽禪師云譬如庭雀焉攀鴻鵠之心還似井蛙豈測滄溟之闊或徇他求如

鑽冰而覓火但歸已解猶向乳而生酥慎勿立我慢幢張邪見網輕侮先覺熒惑後人至哉斯言也昭昭乎天日在上蕩蕩乎佛祖有鑒奉教之者可不懼乎但能信念彌陀可以免斯過咎矣

辯明不生不滅

般若心經云是諸法空相不生不滅不垢不淨不增不減是故空中無色無受想行識等又維摩經云不善不生善法不滅故知色相有去有來佛性不生不滅今有愚人妄以不

產後嗣為不生不斷欲心為不滅駭世恠言惑人妖祟察互邪媿作不淨行斷佛種性悖亂人倫故楞嚴云善男子愛極發狂熾然貪欲則有欲魔入其心腑一向說欲為菩提道化諸白衣平等行欲疑誤衆生入無間獄蓋

以愚迷不知觸淨不覺遭魔以致斯苦諦觀天地肇分有陰陽而有男女有男女而有夫婦有夫婦則有父子有父子則有君臣有君臣則有三綱五常之道三綱統其人倫五常正其教化此聖人立世間之法也吾祖遠公

系年

五三

有云在家者厚身存生我倒未忘以情欲為苑囿以聲色為遊觀耽湎世樂不能特出吾佛示化令反本以求宗在家奉法則是順化之民不遺奉親敬君之禮是故先導之五戒不殺存乎仁不盜存乎義不媿存乎禮不妄

存乎信不酒存乎智身心既律然後示之以出世之法今修念佛三昧以爲西方之歸達乎不生不滅之道是以王臣外護法源天下千載猶一日也其奈當斯之際薰蕕共囿叔麥同畦未易分也敢以衷赤之忱普告信士

但除却一心不亂繫念彌陀之外凡所有相皆是邪僻切須于細真實修行善則從之惡則遠之邪則遣之正則守之若乃立身行道之事息心達本之旨前篇備述明則典刑不爲不多矣遵而行之則吾門眷屬違而作者

魔之黨類所以生遭王法死墮阿鼻殃及累世莫言不道何故漸耳欲得不招無聞業莫謗如來正法輪

辯明曹溪路

旨永嘉大師徃曹溪禮拜六祖印證心地述證道歌云自從認得曹溪路了知生死不相干是人天下禪宗出乎曹溪之源目曰曹溪路也何期愚人妄指人身有夾脊雙開作曹溪一派又妄說六祖云寧度白衣千千萬不度空門半箇僧如斯之輩非特惑於後人是

亦誣於先聖豈不聞永嘉云第一迦葉首傳  
燈二十八代西天記法東流入此土菩提達  
磨爲初祖六代傳衣天下聞後人得道無窮  
數又豈有度白衣而不度空門乎於戲邪妄  
之徒不知來歷竊祖師之名同魍魎妖孽見

去聲

三四

解迷誤善人正是一盲引衆盲相牽入火坑  
也吾知祖宗實德是以稱而傳之吾知闡提  
薄福謗辱吾宗是以恐而懼之吾尚知而大  
懼汝謗聖師之道誑後學之人安得不益懼  
於吾乎汝速宜磨滅改而正之無貽我羞之

爲愈也

辨佛法隱蔽

佛法者出世間之道無爲之法也涅槃經云  
如來開發顯露清淨無翳迷者不解謂是秘  
藏智者了達即不名藏有等愚人妄說官法  
堂堂佛法隱蔽爲撰一落索邪言閉門傳度  
謂之生死奧典幻惑後人至死不與人說逗  
到臨時一場漏逗大似貧兒得錫喚作黃金  
明眼人前如何拈出自不知非反誇能會正  
是瞞人更自瞞也豈知佛說一切法爲度一

切心蓋以衆生心體本來是一用處不同故說一切法也祖師云瓶盤釵釧本是一金名相不同至體無二嗟乎末運法出奸生徃徃失其本體者多是将新羅漆高麗輸間貨錯出巧言令色瞞昧世人一偽既行百真莫辨

卷七

二五

况愛小利者上人鋪席不揀好惡苟圖價廉好看易得等閑被他將一團灰炭塞却眼孔拖向黑地裏脫換去了及至眼開握着黃土也認不得又何金輸直僞之辨哉癡人但得入手貴乎密密珍藏以爲奇貨生怕人知薦

然撞着識者爲伊點破始知分文不真以斯之類比比皆是只爲愚暗福薄眼裏無筋籠心鹵莽兼以不遇真正師匠以致然也殊不知繞指精金從本來有自非作家陶鎔痛下鉗錫煅煉一回轉見性柔金鑿燦然一塊覲

體全真然後隨意作用造成衆器飛光散彩耀人心目永無變色者固知自餘皆不足言矣可不至寶哉正信道流切實着眼

辯明超日月光

大彌陀經云阿彌陀佛光明極大而爲諸佛

光明之王故號無量光佛無邊光佛無礙光  
 佛無對光佛炎王光佛清淨光佛歡喜光  
 佛智慧光佛不斷光佛難思光佛無稱光佛  
 超日月光佛其光明所以照無央數天下幽  
 冥之處皆常大明諸天人民禽獸蜎飛蠕動

見此光明莫不喜悅而生慈心悉得解脫是  
 故十方諸佛菩薩緣覺聲聞悉皆稱讚因名  
 曰超日月光佛蓋以日能照晝月能夜明其  
 德不全佛之光明晝夜長照無虧無欠故名  
 超日月光也今有一等愚人妄指教人於日

月初出之時以口吸採其光吞嚥入腹欲其  
 成寶以當修行秘法謂之超日月光者其錯  
 大矣譬如癡猿聯臂攀樹懸崖下捉水月勞  
 心費力到底成空若是智人達觀速須捨離  
 早求正法免墮迷津專念彌陀究明心地不

素七

主六

見祖師道從門入者不是家珍自己靈光照  
 天燦地人人分上本自圓成一點靈源無內  
 無外頭頭上顯物物上明若能悟此即如來  
 一段光明超日月

辨明髻中珠

髻中珠者法華經云如轉輪王得法國土王於三界而諸小王不肯順伏時轉輪王起種種兵而往討伐戰有功者賞賜諸物獨王頂上有此一珠而不與之末後付與如來亦復如是見賢聖軍與五陰魔煩惱魔死魔共戰

滅三毒出三界破魔網爾時如來亦大歡喜為說諸法而不為說是法華經今乃說之如轉輪王久護明珠末後賜與此蓋世尊最後說是大乘法寶超出諸聖之上以輪王髻珠為喻此珠者即諸佛之圓智乃眾生之理性

悟之則三祇頓越迷之則六道沉淪今有一等愚人錯會經旨妄以運氣入頂作髻中珠謂之寂上乘法密密相傳教人般精運氣衝入頭頂要學世尊頂上有肉髻珠何其愚哉殊不知世尊肉髻乃無見頂相表一乘大法

素七

五七

也無見者自不能見離自見故向上極則諸聖皆不得見離他見故壽禪師心賦云高高法座非聲聞短之能升赫赫日輪豈外道嬰兒之所見無偏無黨至極至尊嗟乎愚癡之人罔知正法顛倒錯亂殊禍移殃於後人

賺他向善俗子墮落深坑可痛惜哉奉勸信士細參本教恪心念佛悔悟前非了知諸法本無髣髴自然顯現堂堂獨露豈假他求哉

辯明無漏果

法華經云諸漏已盡無復煩惱此乃羅漢聲聞修行至習漏俱無也無漏者蓋人之六根常為色聲香味觸法六塵所惑心隨境轉成有漏緣所以輪迴不息修行人六根自靜不被六塵所轉即無漏也今有一等愚人妄將

眼眵鼻涕盡皆喫了謂之修無漏者何蠢乎哉予嘗憫而問之曰六根四大膿血之袋屎尿之囊眵淚涕唾皆屬不淨何得取而食之彼則曰人身之中有七寶不可弃之善收拾者結成舍利證無漏也苦哉苦哉如斯顛倒誠可忍耶更有一等衆生以秘精是無漏者混吾教中迹相傳習潛饜貪欲壞亂正法此是妖精鬼怪夜聚曉散喫菜事魔之徒非是蓮宗之弟子比年以來多有此樣扇動人家清信男女不覺不知鼓入魔道故楞嚴經云

善男子心愛根本窮覽物化天魔得便飛精  
附人說佛涅槃即是現前肉身父子子逆  
代相生常住不絕無別淨居愚人信受亡失  
本心惑爲菩薩常說眼耳鼻舌皆爲淨土男  
女二根即是菩提或食屎尿廣行媻穢彼無

素七

五六

知者信是穢言易入邪悟此名蠱毒惡鬼惱  
亂是人師及弟子俱陷王難汝當先覺不入  
輪迴迷惑不知墮無間獄受得地獄業消復  
入畜生餓鬼今觀邪師妄作之徒假吾佛祖  
之教門造不淨之惡業逆二儀背三光謗佛

祖亂人倫碌碌如蛄蛆之逐穢現受衆苦沒  
後沉淪是罪果何逃哉宜乎不足恠也非進  
死後受報抑且官法不容語云道之以政齊  
之以刑民免而無耻道之以德齊之以禮有  
耻且格誠哉是言今勸善流諦觀聖訓宜自

知耻勿憚改過捐情絕慮正已修行有能古  
教照心則其心自明古鏡照精則其精自形  
若專於淨行趣於菩提決無誤矣其或不然  
三塗業海無邊際千佛出來難救伊

辯明趙州茶

昔趙州和尚見僧問曰汝曾到此不僧云曾到州云喫茶去又問僧云曾到此不僧云不曾到州云喫茶去院主問曾到且從不曾到如何也喫茶去州乃喚院主主應諾州云喫茶去叢林因此有趙州茶話公案今愚人

素七

五九

明祖師大意妄自造作將口內津唾灌漱三十六次嚥之謂之喫趙州茶或有臨終妄指教人用硃砂末茶點一盞喫了便能死去是會趙州機關更可憐憫者有等魔子以小便作趙州茶何愚惑哉非妖怪而何耶真正修

心者但依本分念佛期生淨邦切不可妄將祖師公案杜撰穿鑿是謗大般若之罪人也不見道乍可粉身千萬劫莫將佛法亂傳

揚

### 辨明教外別傳

國悟勤禪師云西方大聖人出迦維羅國作無邊量妙用啓迪群靈其方便順逆開遮餘言遺典盈溢寶藏以至下梢始露一機謂之教外別傳迦葉破顏承當以來的的綿綿直指人心見性成佛不立階梯不生知見利根

上智向無明窟子裏管地煩惱根株中活脫  
應時超證得大解脫西天四七東土二三些  
龍象蹴踏師勝資強格外領畧當下業障冰  
消直截承荷自能管帶打作一片頓契佛地  
尚不肯向死水裏浸却唱出透玄妙句超越

佛祖剗斷露布葛藤如按太阿凜凜神威阿  
誰敢近作家漢確實論量纔有向上向下談  
玄說妙作用纖毫即便叱之謂不是種草直  
下十成煨煉得熟履踐得實始畧放過猶恐  
他時異日落草累人瞎却正眼嗟見一等拍

盲野狐種族自不曾夢見祖師妄言達磨歸  
空謂之傳法救迷情以至借他從上最大宗  
師馬祖趙州名目脫賺後人及誇初祖隻履  
西歸普化空棺皆謂此術有驗謂之形神俱  
妙生死秘法遞相傳習而人皆厚愛此者生

業

三十

怕臘月三十日憶惶競學歸程之法除夜拜  
影喚主人公真是誑講閻閻捏偽造窠貽高  
人唾鄙復有一種假托達磨胎息趙州十二  
時別歌龐居士轉河車頌遞互指受密付傳  
持希望生天更要預知死日殊不知此真妄

想邪心愛見本是善因反招惡果多見豪傑之士高談闊論者不知往往信之那知失却故步畫虎成狸遭明眼人覷破默觀憐憫豈諸佛與列祖體裁止如是耶曾不自回照始末居然可知矣海內學此者如麻似粟習以成風恬不知恠其高識遠見自不因循恐乍發意未入閩奧立志雖專跋涉雖遠遇增上慢導人邪見稠林末上一錯永沒回轉其流浸廣莫之能遏因出此語以痛告之庶有志願於大解脫大總持者可以辨之而同入大

薩婆若海汎慈舟接濟群品俾正真妙道流於無窮豈不快哉

辨開閉諸惡趣門開示涅槃正路

諸惡趣門者乃身口意三業也所謂身殺盜婬口妄言綺語惡口兩舌意貪瞋癡修淨業

卷七

三十一

人正心向道截斷已上十不善行則不入惡道謂之關閉諸惡趣門也開示者指出也涅槃者不生不滅也正者不偏路即西方之道也今有愚人指口為諸惡門鼻為涅槃路教人臨終時緊閉其口令氣從鼻出謂之出門

一學又妄將因字以爲公案教人口裏着力  
忍了氣透這一關或云因字四圍是酒色財  
氣或言地水火風或言生老病死等皆是卜  
度妄計曲說嗟乎這一箇因字瞞盡多少人  
殊不知此字玉篇明載戶卧切即阿字去聲  
呼也此箇因字一切世人口中未嘗不說喻  
人矣物人忽然尋覓不覺發此一聲是因字  
也宗門多言此字者蓋尋師訪道之人參究  
三二十年忽然心花發現會得此事不覺因  
地一聲如失物得見慶快平生是其字義也

如是則念佛之人但於念念中仔細究竟本  
性彌陀忽然親悟親見真實到因地一聲慶  
自然明徹矣故智覺壽禪師云心外求法望  
石女而生兒意上起思邀空花而結果本非  
有作性自無爲智者莫能運其想像者何以

狀其儀言語道亡是得路指歸之日心行處  
滅當放身捨命之時可謂唯此一事實餘二  
即非真

### 辯明四生

大珠慧海禪師云九類衆生一心具足隨造

隨成無明暗蔽為卵生煩惱包裹為胎生愛  
水浸潤為濕生歛起妄念為化生悟即成佛  
迷現眾生菩薩只以念念心為眾生若了心  
體空寂名為度眾生也智者於自本際上度  
於未形未形既空即知實無眾生得滅度者

素七

三五

有等愚人不識自心胡卜亂度妄說臨終之  
時眼見轎馬樓臺幡蓋鏡鉞之類為四生六  
道胎窠不隨他去者脫四生也殊不知臨終  
現境是你平時所作善惡業相神識自現即  
非外來故先德云作惡而惡境現前念佛而

佛界自至若是時中把捉不住做不得主當  
被妄想顛倒所使臨當風火散壞之時如落  
湯罈蟹相似又焉能作主宰耶是以圭峰禪  
師云作有義事是惺悟心作無義事是狂亂  
心狂亂隨情念臨終被業牽惺悟不由情臨  
終能轉業今以此語直告諸人當自念言我  
今修行淨業本為生死佛祖垂教豈欺我哉  
當依正法真實存心專念彌陀捨諸虛妄朝  
思夕想念念念願生西方如此則塵勞業識當  
下瓦解冰消反觀自己生死尚不可得又喚

甚麼作衆生乎故懺云於一念中得念佛三昧普度十方六道一切衆生各各出離苦輪

死涅槃本平等  
破妄立十號

素七

三三

西方文云念佛之人於相好光明之中得見阿彌陀佛則無明頓破煩惱永忘法界之門忽然通達一乘之路卓爾顯明十號俱彰三身圓顯此明修行人得證佛果十號俱彰也十號者菩薩戒經云一曰如來無虛妄故二曰應

永樂北藏

廬山蓮宗寶鑒

第一九五册

供良曰福三曰正徧知法四曰明行足天五曰善逝不六曰世間解智七曰調御丈夫明八曰天人師眼九曰佛善十曰世尊無何期愚

人不知佛法妄立十號歸程稱爲達磨大師傳來生死秘法却云鵲巢灌頂蘆芽穿膝玉柱麤混蛇八棍襠波斯獻寶天鼓不鳴蓮花池乾二祖斷臂立雪齊腰神光不現以此十件謂之大事因緣性往蓮宗被此等盲師瞎

漢遜相傳授。賤人性命。從冥入冥。陷於非道。何不思之甚也。達磨大師初至此土。不立文字。直指人心。見性成佛。又安得有一法傳授乎。豈不聞五祖弘忍大師謂六祖曰。佛即心。傳心法。即以心印心。佛佛惟傳本體。師師

密付本心是也。莊子云。使道之可傳。人莫不傳之。子孫道之可獻。人莫不獻之。君親其不可傳。獻者無他。中無主而外無其證也。又嘗聞我佛釋迦世尊。千生煉行百劫。修心迺從兜率降跡。王官弃萬乘榮貴。向雪山修行。冷

麻食麥苦行六年。覩見明星悟道成佛。人中聖中。稱為大覺十號。具足作天人師。至於鵠巢頂上。蘆茅穿膝之類。皆當年實事。初無表法止是端坐不動。定久忘形之意。後之學者。不近智達。不體我佛建立教門。大不容易。纔

素

三十四

得入他門戶。行願不習。識見俱無。便要為師。傳度弟子。做大模樣。逞我能會。撞入邪魔黨。類中學他許多邪法。雜毒入心。如落水鬼。相似黑地裏拖人入地獄去。苦哉苦哉。且如二祖斷臂立雪。齊腰的是當時為法忘軀。猛烈

之志本傳備載分明學者自當詳究豈可妄  
爲甘受謗法之罪永沉苦海之誅永嘉云非  
不非是不是差之毫釐失千里是則龍女頰  
成佛非則善星生陷墜信麼盡情掃蕩閑家  
具鐵樹花開別有春

誓願派道

切惟取初一念元從淨土中來泊沒多生未脫  
娑婆世界幸逢蓮社得遇正宗仰藉三寶餘  
麻感沐導師化育伏爲教門之下多有錯路  
修行嗟信心盡作魔民致良善俱遭邪墜正

因泯絕慧命難存反招謗法深憊豈有誦持  
功德觀斯境界以長吁痛切身心而不忍是  
乃搜大藏之要旨用證本宗掃百家之是非  
開明大道並是依經辨理顯正摧邪照了無  
私故名寶鑑俾夫後學照心目而妍醜自知

素

三五

導彼迷途達家鄉而免諸流浪是集克就鄙志  
當陳百拜祖庭重申大誓告白十方諸佛諸  
大祖師望賜慈光證明祈禱普度敬自發心  
立願照依所集蓮宗寶鑑篇字數一字三禮  
每一禮念楞嚴咒心一遍三稱南無觀世音

菩薩尊號望悲心而憐憫賜法力以冥加俾  
魔外以皈依真乘之流布與彼盲瞶開眼  
目於諸病苦作良醫昏衢黑暗之中為燈為  
燭苦海洪波之內為舟為航危險處作大橋  
梁迷路中示其正道普為十方蓮社諸上善

人回期懺滌於身心各願消除於業障非法  
說法之咎法說非法之憊一智能滅萬年愚  
一燈能破千年暗妄意消而空花滅正信生  
而淨行彰信禮彌陀普同回向與諸大眾並  
從今日發菩提蓋於未來永劫常行菩薩道

離非梵行遠邪見師願盡此報身同生安養  
國常修六念及六波羅廣運四心與四弘誓  
發四十八願如阿彌陀得念佛三昧如大勢  
至修普賢之行願等觀音之慈悲學大智慧  
如文殊次登補處如彌勒頓入法界圓證上

乘分身徧至於十方大悲普度於一切建法  
幢立宗旨耀慧日除痼冥諸魔外道悉歸降  
而地普天皆嚮化辯才無礙廣利塵沙威德  
無邊拯濟舍識父母師長伊登解脫之門累  
劫怨親盡出沉淪之海伏望觀是集者起護

法心蕩歷初之迷情破千重之疑網頓豁正  
眼明悟本心淨土道場不動足到西方大聖  
如對目前萬法了然妙在茲也惟冀天龍歡  
喜聞正法以護持凡聖皈依掃邪風而絕迹  
弘揚祖道廣播宗風融大千同爲清泰之邦

素七

三五

俾四海共樂無爲之化正見邪見盡入無生

皇恩

佛恩一時等報虛空界盡眾生界盡眾生業  
盡眾生煩惱盡我願乃盡而虛空界乃至眾  
生眾煩惱不可盡故我此願王無有窮盡念

念相續無有間斷身語意業無有疲厭普賢  
菩薩發願如是諸大祖師發願亦如是我今  
發願亦如是普爲蓮社大衆發願亦如是盡  
未來際一切情與無情發願亦如是如是如  
是無不如是願同如是恒沙衆盡入如來願

海中

西蜀楚山和尚示衆念佛警語

原夫佛不自佛因心而佛心不自心由佛而  
心離心無佛離佛無心心佛殊名體無二致  
是故念佛念心心念佛無念無心無心無

佛心佛兩忘念不可得只這不可得處脫體  
 分明纖塵不間是以真機觸目徧界難藏山  
 色溪聲頭頭顯露性相平等理事混融箇裏  
 覓一毫自他淨穢之相了不可得何聖凡迷  
 悟之有耶於此果能豁開智眼頓悟其旨直

素七

三七

下知歸不妨慶快設或未能領契須假方便  
 而入所謂方便而入者何用別覓玄妙但只  
 要發起一箇勇猛堅固信心將一句阿彌陀  
 佛頌在心目之間不拘經行坐卧靜鬧闌忙  
 默默提撕頻頻返照了知佛即是心未審心

是何物要看這一念從甚麼處起又復要看  
 破這看的人畢竟是誰如是觀照念念無間  
 久久自然煉成一片水泄不通忽於聞聲見  
 色應機接物處不覺驀然冷灰豆爆烈心崩虛  
 空之時管取叅究事畢到此便見自性彌陀

頭頭顯現常光淨土觸處洞然始信吾言不  
 欺於汝而其平生修行之志亦乃驗於茲矣  
 恐猶未諭重說偈言

心佛由來強立名 都緣攝念遣迷情

根塵頓去心珠現 幻翳空來慧鏡明

一法不存猶是妄 全機撲碎未為平

直須揣見虛空骨 者取優曇火内生

淮陽曉山和尚勸修淨業箴

三途罪報因業重六趣沉淪為惡多若欲出  
離生死海速須迴首念彌陀

一個彌陀佛人人本具足祇緣痴嗔愛生死  
虛出沒苦海業因循萬劫受迷津不發迴頭  
念轉入展轉深勸君須猛烈念佛宜超越西  
方有世界名曰安養國九品妙蓮臺三空真  
實際寶殿寶樓閣黃金以布地光明常照耀

無三惡道懼示汝諸有情可以整心趣棄却  
貪嗔痴大家秉智慧冷眼掛眉間看破紅塵

事積金玉如山難買三寸氣眷屬與恩親暫

如傀儡戲生前一聚歡死後誰能替終有散

場時有甚風流譬靜裏細思量一場無滋味

素七

三

何不早休心念佛修三昧提箇古彌陀始終  
莫令退猶如患目人投醫王所治遠近與高  
低拄杖為憑據信手把堅持一念無有二步  
步著脚半點點知落處但無能所礙終有時  
節至親叩得鑿王示出真妙濟豁開正眼睛

點破虛幻翳光明照十方廓爾通三際來去  
得自由一體無拘繫快樂任逍遙高唱哩囉  
哩若能依此修至道無難易是人命終時蓮  
池定有會只要辦冒心山僧無賺意各各  
早迴光想念西方去九品悟真空一念超實  
地生佛體元同了證無殊異

廬山蓮宗寶鑒念佛正論卷第十終